

*Sarajevo, 28.06.2017. god.
Broj: 403/17*

**ZAPISNIK I ZAKLJUČCI SA PRVE KONSTITUIRAJUĆE
SJEDNICE PREDsjedništVA SKUPŠTINE SAVEZA OPĆINA I GRADOVA
FEDERACIJE BOSNE I HERCEGOVINE**

Dana 28.06.2017. godine u Sarajevu je održana Prva sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza su prisustvovali:

1. Hamdo Ejubović, načelnik Općine Hadžići i predsjednik Predsjedništva Saveza;
2. Branko Bago, načelnik Općine Posušje;
3. Stanko Vincetić, načelnik Općine Orašje;
4. Muhamed Ramović, gradonačelnik Grada Goražde;
5. Marin Radišić, načelnik Općine Čitluk;
6. Nermin Mandra, načelnik Općine Kakanj;
7. Edin Hozan, načelnik Općine Jajce;
8. Kristijan Petrović, po ovlaštenju načelnika Općine Tomislavgrad;
9. Mustafa Resić, po ovlaštenju načelnika Općine Centar Sarajevo.

Pored navedenih, sjednici su prisustvovali i: Faris Hasanbegović, predsjedavajući Skupštine Saveza, Alma Pinjić, predsjednica Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša, Dr. Nedim Memić, konsultant za javne finansije, Vesna Travljanin, direktor Saveza, Zlata Turkić, viši saradnik za rad sa skupštinskim komisijama i institucijama vlasti i Selma Fišek, viši saradnik za pravna pitanja.

Hamdo Ejubović je pozdravio sve prisutne, zahvalio se na odzivu i otvorio Prvu sjednicu Predsjedništva Saveza. Nakon pojedinačnog predstavljanja novih članova Predsjedništva, Hamdo Ejubović je predložio Dnevni red sjednice kako slijedi:

1. Konstituisanje Predsjedništva Skupštine Saveza općina i gradova Federacije BiH
2. Poslovnik o radu Predsjedništva Skupštine Saveza općina i gradova Federacije BiH
3. Zapisnik i zaključci sa Sedamnaeste sjednice Predsjedništva Skupštine Saveza općina i gradova Federacije BiH
4. Konstituisanje komisija Saveza:
 - 4.1. Zabilješka sa sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša
Izjavitelj: Alma Pinjić, predsjednica Komisije
 - 4.1.a) Informacija sa 22. redovne sjednice Predstavničkog doma Parlamenta Federacije BiH vezano za Nacrt zakona o koncesijama
Izjavitelj: Vesna Travljanin, direktor Saveza
 - 4.2. Zabilješka sa sjednice Komisije za ekonomski razvoj općina i gradova i finansije
Izjavitelj: predsjednik Komisije
5. Formiranje Mreže eksperata/stručnjaka za smanjenje rizika od katastrofa unutar Saveza općina i gradova Federacije BiH i davanje saglasnosti na Poslovnik o radu Mreže
Izjavitelj: Vesna Travljanin, direktor Saveza
6. Uplata članskog doprinosa Savezu
 - Izvod iz Zapisnika sa Šesnaeste sjednice Predsjedništva Skupštine Saveza održane 05.04.2017. godine
7. Informacije:
 - 7.1. Prijedlog zakona o turizmu Federacije BiH i Prijedlog zakona o boravišnoj taksi Federacije BiH
 - 7.2. Informacija sa održanih obuka za općinske vijećnike
 - 7.3. Projekat Vijeća Evrope „Akademija za lidere“
 - 7.4. Projekat „Jačanje saradnje saveza općina i gradova u BiH“ – AMCS
 - 7.5. Projekat „Regionalni program lokalne demokratije na Zapadnom Balkanu“ (ReLOaD)
 - 7.6. Konferencija „Dvije godine od stupanja na snagu Sporazuma o stabilizaciji i pridruživanju“
 - 7.7. Generalna skupština NALAS-a
 - 7.8. Sastanak Evropske komisije regiona, Radna grupa Zapadnog Balkana
 - 7.9. Zapisnik s inicijalnog sastanka "Platforma za dijalog u sektoru vodnih usluga u BiH";
8. Tekuća pitanja
 - 8.1. Tužba Saveza općina i gradova Federacije BiH protiv Federacije BiH vezano za otplatu kredita prema Međunarodnom monetarnom fondu
 - 8.2. Imenovanje zamjenika predstavnika Saveza u Savjetu za strane investitore Federacije BiH

Predsjedništvo Saveza je jednoglasno usvojilo predloženi Dnevni red.

1. Konstituisanje Predsjedništva Skupštine Saveza općina i gradova Federacije BiH

Hamdo Ejubović je naglasio je da je na današnjoj sjednici konstituisan novi saziv Predsjedništva Saveza, nakon održane Izborne skupštine Saveza.

2. Poslovnik o radu Predsjedništva Skupštine Saveza općina i gradova Federacije BiH

Hamdo Ejubović je otvorio raspravu o Poslovniku o radu Predsjedništva. Predložio je da se u jednom od članova Poslovnika doda odredba kojom će se propisati da člana Predsjedništva Saveza na sjednicama Predsjedništva može zamjeniti osoba koju on ovlasti.

Predsjedništvo Saveza je jednoglasno usvojilo Poslovnik o radu Predsjedništva Skupštine Saveza općina i gradova Federacije Bosne i Hercegovine uz predloženu dopunu kojom će se propisati da člana Predsjedništva Saveza na sjednicama Predsjedništva može zamjeniti osoba koju on ovlasti.

3. Zapisnik i zaključci sa Sedamnaeste sjednice Predsjedništva Skupštine Saveza općina i gradova Federacije Bosne i Hercegovine

Predsjedništvo Saveza je jednoglasno usvojilo Zapisnik i zaključke sa Sedamnaeste sjednice Predsjedništva Skupštine Saveza općina i gradova Federacije Bosne i Hercegovine.

4.1. Zabilješka sa sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša

Alma Pinjić je u svojstvu predsjednice Komisije za imovinska pitanja, prostorno uređenje, stambeno- komunalne djelatnosti i zaštitu životnog okoliša izvijestila da je ova komisija inicirala da jedinice lokalne samouprave što prije daju svoje primjedbe i komentare na Nacrt zakona o koncesijama, te je predložila da Savez organizuje javnu raspravu o ovom zakonu s obzirom na njegov značaj. Dodala je da Zakon o koncesijama ima uticaj i na druge zakone kao što su Zakon o stvarnim pravima i Zakon o javno - privatnom partnerstvu.

Hamdo Ejubović je naglasio da je u materijalima za sjednicu dostavljena i informacija sa 22. sjednice Predstavničkog doma Parlamenta Federacije BiH u kojoj je navedeno da je Predstavnički dom odredio javnu raspravu o Nacrtu zakona o koncesijama u trajanju od 90 dana.

Nermin Mandra je istakao da je potrebno alarmirati jedinice lokalne samouprave da se uključe u

javnu raspravu. Naglasio je da nije isto davati pod koncesiju zemljište za izgradnju auto-puta i koncesiju za korištenje kamena i uglja, te da bi se u skladu s tim trebao urediti i odnos po pitanju koncesione naknade. Naveo je da u Nacrtu ovog zakona postoji još nejasnoća ali da će se to vjerovatno izdefinisati tokom javne rasprave.

Hamdo Ejubović je konstatovao da je komisija dala dosta informacija u materijalu sa sjednice. Naveo je da bi Predsjedništvo trebalo usvojiti zaključak da se održi javna rasprava o Nacrtu zakona o koncesijama u koju se trebaju uključiti jedinice lokalne samouprave kako bi se definisali naši stavovi i gdje bi usvojili i stavove i zaključke po pitanju Zakona o porezu na dohodak, Zakona o doprinosima, Zakona o turizmu i Zakona o boravišnoj taksi koji su bitni za jedinice lokalne samouprave.

Edin Hozan je postavio pitanje da li svi kantoni u Federaciji Bosne i Hercegovine imaju usvojen Zakon o koncesijama.

Muhamed Ramović je istakao da lokalne zajednice u svakom slučaju najlošije prođu. Napomenuo je da je Savez u proteklom mandatu mnogo puta slao dopise višim nivoima vlasti, te da smo imali sastanak sa premijerom Federacije Bosne i Hercegovine koji je ocijenio veoma lošim i gdje je pokazan loš odnos premijera prema predstavnicima lokalnog nivoa vlasti. Istakao je da moramo lobirati da se nametnemo u većoj mjeri, te da nas viši nivoi vlasti počnu više uvažavati. Dalje je naveo da je Savez digao glas vezano za predviđeno ukidanje namjenskih sredstava jedinica lokalne samouprave (0,5%) za poslove zaštite i spašavanja, te da ta zakonska izmjena nije prošla.

Hamdo Ejubović se složio sa Muhamedom Ramovićem u vezi Zakona o zaštiti i spašavanju ljudi i materijalnih dobara od prirodnih i drugih nesreća.

Muhamed Ramović je istakao da Savez mora nastaviti i sa aktivnostima vezanim za tužbu Saveza protiv Federacije Bosne i Hercegovine vezano za otplatu kredita prema Međunarodnom monetarnom fondu.

Mustafa Resić je istakao da će jedinice lokalne samouprave tokom javne rasprave dati svoje primjedbe na zakone od značaja za lokalne zajednice.

Predsjedništvo Saveza je jednoglasno prihvatilo Izvještaj sa sjednice Komisije za imovinska pitanja, prostorno uređenje, stambeno- komunalne djelatnosti i zaštitu životnog okoliša sa sljedećim zaključcima:

- **Savez općina i gradova Federacije BiH podržava donošenje Zakona o koncesijama što će stvoriti mogućnosti za nova ulaganja u korištenju prirodnih resursa koji će doprinijeti bržem i boljem ekonomskom razvoju;**
- **Nacrt zakona nije uveo lokalnu samoupravu u sistem koncesija, što je apsolutno suprotno Zakonu o principima lokalne samouprave u Federaciji BiH;**

- Tražiti da se jedinice lokalne samouprave uključe kao koncesori za ona dobra (predmete koncesije) koji se nalaze na njenom području i u domenu njenog rada (izletišta, ski staze, sportski tereni, otpad, komunalna higijena);
- Tražiti povećanje omjera naknade (član 25. - naknade za koncesiju) na način da 80% pripada jedinicama lokalne samouprave, 10% kantonu, i 10% Federaciji BiH za stavljanje pod koncesiju dobara koja degradiraju okoliš i bitno utiču na život na tom prostoru (hidroakumulacije, vodeni tokovi);
- Za druge vrste koncesija (GSM licence, radio-difuzna mreža) ostaviti omjer 20% Federaciji BiH, 30% kantonu, 50% jedinicama lokalne samouprave;
- Tražiti diferenciran pristup za različite vrste koncesija (paušalno su navedeni procenti);
- Tražiti da općinska/gradska vijeća daju saglasnost, a ne mišljenje za uspostavljanje koncesionog odnosa na onim resursima koji nisu u vlasništvu jedinice lokalne samouprave;
- Tražiti da član Komisije za koncesije obavezno mora (a ne može), biti iz jedinice lokalne samouprave na čijem se prostoru nalazi koncesiono dobro;
- Tražiti razgraničenje nadležnosti nad vlasništvom prirodnog resursa koje se daje pod koncesiju;
- Tražiti da se sredstva po osnovu naknade za koncesiju u roku od 8 dana od dana uplate, prebace na račun jedinice lokalne samouprave;
- Uobličiti ove zaključke i u vidu stava Saveza općina i gradova Federacije BiH u vezi sa Nacrtom zakona o koncesijama uputiti Predstavničkom domu Parlamenta Federacije BiH (predsjedavajućem i predsjednicima klubova poslanika).
- Predsjedništvo Saveza je zaključilo da Savez, zbog značaja Zakona o koncesijama, održi javnu raspravu za svoje članice, gdje će se formirati stavovi Saveza i isti proslijediti Vladi Federacije BiH i Parlamentu Federacije BiH;
- Prije javne rasprave potrebno je anketirati članice Saveza da dostave svoje primjedbe koje će biti obrađene od strane Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša;
- Također je potrebno da se kroz ovu javnu raspravu razmotre i oni zakonski propisi koji su u parlamentarnoj proceduri, a koji su od značaja za jedinice lokalne

samouprave (Zakon o porezu na dohodak, Zakona o doprinosima, Zakon o turizmu Federacije BiH i Zakon o boravišnoj taksi Federacije BiH).

4.2. Zabilješka sa sjednice Komisije za ekonomski razvoj općina i gradova i finansije

Zlata Turkić je informisala članove Predsjedništva da je sjednica Komisije za ekonomski razvoj općina i gradova i finansije održana dan prije sjednice Predsjedništva (27.06.2017.), te da su zbog toga zaključci sa sjednice Komisije podijeljeni članovima Predsjedništva na samoj sjednici Predsjedništva. Izvijestila je da je za predsjednicu Komisije za ekonomski razvoj općina i gradova i finansije izabrana Radinka Dujak, (Općina Odžak), a da je izbor zamjenika predsjednika Komisije ostavljen za narednu sjednicu. Zlata Turkić je naglasila da je ova Komisija, između ostalog, razmatrala Nacrt zakona o porezu na dohodak, Nacrt zakona o doprinosima, te Nacrt zakona o ograničenoj upotrebi duhana, duhanskih i ostalih proizvoda za pušenje. Predložila je da se i po pitanju ovih zakona Parlamentu Federacije BiH dostave stavovi Saveza, te da se istima treba posvetiti dužna pažnja obzirom na njihov značaj.

Hamdo Ejubović je istakao da mu je drago da je formirana Komisija za ekonomski razvoj općina i gradova i finansije koja može razmatrati zakonske propise iz svoje oblasti, te je naglasio da bi i Nacrt zakona o porezu na dohodak također trebalo razmotriti kroz javnu raspravu Saveza zajedno sa Nacrtom zakona o koncesijama.

Stanko Vincetić se uključio u raspravu i naveo da je ovu priču potrebno proširiti sa situacijom u zavodima za zapošljavanje i zavodima zdravstvenog osiguranja jer će i ovi zavodi izgubiti sredstva predloženim Nacrtom zakona o porezu na dohodak i Nacrtom zakona o doprinosima. Istakao je da je po njegovom mišljenju priča o ovim zakonima dijametralno suprotna od zdrave logike, jer smo mi društvo u kojem populacija konstantno stari i gdje odlaze mladi. Također je naglasio da ni od koga nije dobio odgovor kako će se ovi zakoni reflektirati na tržište rada.

Marin Radišić je istakao da smatra da bi Općinu Čitluk konkretno, oštetio predloženi Zakon o porezu na dohodak.

Faris Hasanbegović je naveo da podržava održavanje javne rasprave jer nam je pored Zakona o koncesijama koji je bitan za jedinice lokalne samouprave, također jako važan i Zakon o porezu na dohodak koji je od značaja za cjelokupnu ekonomiju našeg društva. Naglasio je da će po njegovim saznanjima biti usvojen Nacrt Zakona o porezu na dohodak.

Zlata Turkić je istakla da je, zbog činjenice da je iz kabineta predsjedavajuće Doma naroda Parlamenta Federacije BiH upućen dopis Savezu općina i gradova Federacije BiH sa zahtjevom za dostavljanjem mišljenja na Nacrt zakona o porezu na dohodak, Nacrt zakona o doprinosima, te Nacrt zakona o ograničenoj upotrebi duhana, duhanskih i ostalih proizvoda za pušenje s obzirom na činjenicu da će njihova primjena imati efekte na prostoru cijele Federacije BiH, a posebno u

lokalnoj samoupravi, potrebno da obavijestimo Dom naroda Parlamenta Federacije BiH o javnoj raspravi koju će Savez organizirati, kao i da podržavamo donošenje reformskih zakona.

Edin Hozan je istakao da se ne bi u cijelosti složio sa svim ovim diskusijama. Smatra da, kada su u pitanju reformski zakoni, isti trebaju biti usvojeni. Istakao je u našem društvu nema u značajnom broju porodica koje broje pet ili sedam članova. Mišljenja je da se ne mogu devastirati dobre stvari ako neke druge stvari ne funkcionišu.

Predsjedništvo Saveza je usvojilo Izvještaj sa Komisije za ekonomski razvoj općina i gradova i finansije sa sljedećim zaključcima:

- **Savez općina i gradova Federacije BiH podržava donošenje Zakona o porezu na dohodak i Zakona o doprinosima u cilju uređenja ovih oblasti;**
- **Savez predlaže cjelovitu detaljniju analizu predloženih zakonskih rješenja, kako bi se otklonili nedostaci i nejasnoće;**
- **Predsjedništvo Saveza je usvojilo zaključak Komisije da se u članu 12. Nacrta zakona o porezu na dohodak (Stopa poreza na dohodak) briše stav 2., da ona bude ista za sve, tako da:**

Član 12. mijenja se i glasi:

„Porez na dohodak plaća se po stopi od 10% na mjesečnu osnovicu poreza na dohodak do 800,00 KM, odnosno godišnju osnovicu 9.600,00 KM“;

- **Da se u članu 45. (lični odbitak) predvidi rješenje koje je bilo regulisano članom 24. stav 2. važećeg Zakona o porez na dohodak, a koji glasi:**

(2) Rezydentni porezni obveznici mogu odbiti i lični odbitak:

1) 0,5 osnovnog ličnog odbitka iz stava 1. ovog člana za izdržavanog bračnog druga, kao i za bivšeg bračnog druga kojem plaća alimentaciju,

2) 0,5 osnovnog ličnog odbitka iz stava 1. ovog člana za prvo izdržavano dijete,

3) 0,7 osnovnog ličnog odbitka iz stava 1. ovog člana za izdržavano drugo dijete,

4) 0,9 osnovnog ličnog odbitka iz stava 1. ovog člana za izdržavano treće i svako dalje dijete,

5) 0,3 osnovnog ličnog odbitka iz stava 1. ovog člana za svakog drugog izdržavanog člana uže porodice, i

6) 0,3 osnovnog ličnog odbitka iz stava 1. ovog člana za utvrđenu vlastitu invalidnost, kao i za utvrđenu invalidnost svakog člana uže porodice koje porezni obveznik izdržava;

- **Da se obavezno uvede oporezivanje dobitaka od igara na sreću u iznosu od 10%;**
- **Da se riješi oporezivanje prijevoza učenika jer je prijevoz za radnike oporeziv prema**

Nacrtu zakona, te se postavlja pitanje „duplog oporezivanja“;

- **Da se ne vrši oporezivanje toplog obroka u iznosu od 8,50 KM. U slučaju da se isti oporezuje, tražiti izmjenu u Nacrtu zakona o doprinosima – ukidanje stava 9. u članu 17.**
- **Članovi Komisije nisu imali primjedbi na Nacrt zakona o ograničenoj upotrebi duhana, duhanskih i ostalih proizvoda za pušenje**
- **Komisija smatra da Savez općina i gradova Federacije BiH ne može zauzeti stav po Inicijativi za izmjenu i dopunu Zakona o porezu na promet nekretnina Zeničko-dobojskog kantona zbog različitog mišljenja jedinica lokalne samoprave sa područja Zeničko-dobojskog kantona.**
- **Komisija ne može zauzeti stav o Nacrtu zakona o porezu na imovinu i naslijeđe Unsko-sanskog kantona, kao i o amandmanima na Prijedlog istog zakona zbog činjenice da jedinice lokalne samouprave sa područja Unsko-sanskog kantona nisu Savezu dostavile mišljenje o navedenom zakonu.**

5. Formiranje Mreže eksperata/stručnjaka za smanjenje rizika od katastrofa unutar Saveza općina i gradova Federacije BiH i davanje saglasnosti na Poslovnik o radu Mreže

Vesna Travljanin je izvijestila da je 20. juna u Sarajevu održan prvi sastanak Mreže stručnjaka/ekspertata za smanjenje rizika od katastrofa unutar Saveza općina i gradova Federacije BiH na kojem je ustanovljeno da je Mreža savjetodavno tijelo unutar Saveza koje u svom radu usvaja stavove, mišljenja, prijedloge i sugestije, vrši razmjenu dobrih praksi i iskustava, organizuje stručne skupove i savjetovanja na teme koje su vezane za djelokrug rada Mreže. Navela je da je cilj Mreže primjena i prilagođavanje primjera dobrih praksi udruživanja jedinica lokalnih samouprava, radi smanjenja rizika od elementarnih nepogoda i drugih nesreća u jedinicama lokalne samouprave, kako bi se umanjile posljedice ovih događaja i zaštitili ljudi, životna sredina i imovina.

Vesna Travljanin je dalje istakla da je za predsjednika Mreže stručnjaka/ekspertata za smanjenje rizika od katastrofa izabrana Samira Drakovac iz Grada Goražda, dok su za zamjenike predsjednika izabrani Nurudin Hrusto iz Općine Kakanj i Juro Brašnjić iz Općine Odžak, kao i da je utvrđen Poslovnik o radu ove Mreže.

Predsjedništvo Saveza je primilo k znanju ovu informaciju.

Predsjedništvo Saveza je dalo saglasnost na Poslovnik o radu Mreže eksperata/stručnjaka za smanjenje rizika od katastrofa unutar Saveza općina i gradova Federacije BiH.

6. Uplata članskog doprinosa Savezu

- **Izvod iz Zapisnika sa Šesnaeste sjednice Predsjedništva Skupštine Saveza održane 05.04.2017. godine**

Vesna Travljanin je istakla da bi se načelnici morali malo više aktivirati kada su u pitanju procesi lobiranja za zakonske propise od značaja za jedinice lokalne samouprave, jer puno veći značaj ima kada se na sjednici u Parlamentu pojave načelnici u odnosu na zaposlenike Saveza. Naglasila je da bi se Strategija razvoja Saveza za period 2015.-2022. godina trebala dostaviti novim članovima Predsjedništva Saveza. Vesna Travljanin je dalje navela da bi kroz projekat koji očekujemo, a za koji smo aplicirali kod Švedske i Švicarske Vlade, bilo mnogo lakše kada bismo dobili sredstva za plaćene eksperte koji bi nam pružili stručnu pomoć u izradi stavova, mišljenja i analiza Saveza po pitanju različitih zakonskih propisa.

Istakla je također, da je potrebno obezbijediti veći stepen naplate članarina od strane članica Saveza jer procenat naplate u iznosu od 67% koji je zabilježen u posljednjem izvještaju Nadzornog odbora nije zadovoljavajući. Naglasila je da je Nadzorni odbor razmatrao i mogućnost podizanja tužbi protiv onih jedinica lokalne samouprave koje imaju dugovanja po osnovu članskog doprinosa. Naglasila je da je to pitanje ipak ostavljeno novom sazivu Predsjedništva da se o tome izjasni.

Edin Hozan je istakao da po njegovom mišljenju ne treba birati sredstva kako bi se povećao uticaj na Parlament. Naglasio je da zaposlenici Saveza trebaju blagovremeno načelnicima sugerisati to iz koje je lokalne zajednice određeni poslanik u Parlamentu kako bi načelnici mogli dogovoriti i usaglasiti određene stavove sa predstavnicima svojih lokalnih zajednica, a koji su poslanici u parlamentima viših nivoa vlasti. Također je istakao da su članice Saveza svakako u obavezi da redovno uplaćuju članski doprinos Savezu.

Mustafa Resić je naveo da treba još jednom apelirati na članice Saveza da izmire svoja članska dugovanja.

Hamdo Ejubović je istakao da kroz jedan diplomatski rječnik treba ponovo apelirati na članice da izmire svoje obaveze.

Predsjedništvo Saveza je jednoglasno zaključilo da Stručna služba Saveza uputi dopis svim članicama Saveza koje imaju dugovanja po osnovu članskog doprinosa sa zahtjevom za izmirenje istih.

7. Informacije:

7.1. Prijedlog zakona o turizmu Federacije BiH i Prijedlog zakona o boravišnoj taksi Federacije BiH

Selma Fišek je informisala članove Predsjedništva da je Federalno ministarstvo okoliša i turizma dostavilo Savezu na očitovanje Prijedlog zakona o turizmu Federacije BiH i Prijedlog zakona o boravišnoj taksi Federacije BiH. Naglasila je da je pozitivna stvar za jedinice lokalne samouprave to što je Prijedlogom zakona o turizmu propisano da turistička organizacija može biti:

- a) Turistička organizacija Federacije Bosne i Hercegovine;
- b) Turističke organizacije kantona;
- c) Turističke organizacije gradova;
- d) Turističke organizacije općina;
- e) Međuopćinske turističke organizacije.

Napomenula je da je Savez svojim članicama uputio Prijedlog zakona o turizmu Federacije BiH i Prijedlog zakona o boravišnoj taksi Federacije BiH radi davanja primjedbi i sugestija, te istakla da jedinice lokalne samouprave imaju mogućnost da daju svoje eventualne komentare na prijedloge navedenih zakona.

Predsjedništvo Saveza je primilo k znanju ovu informaciju.

7.2. Informacija sa održanih obuka za općinske vijećnike

Selma Fišek je ukratko izvijestila da je Savez na osnovu Strategije obuke za uposlenike i izabrane zvaničnike u jedinicama lokalne samouprave u Federaciji Bosne i Hercegovine 2016. – 2020. godine („Službene novine FBiH“, broj 14/16) i Odluke o osiguranju finansijske održivosti obuke za uposlenike i izabrane zvaničnike u jedinicama lokalne samouprave Federacije Bosne i Hercegovine („Službene novine FBiH“, broj 50/14), koje je usvojila Vlada Federacije Bosne i Hercegovine, nadležan za poslove vezane za operativno upravljanje obukom izabranih zvaničnika (vijećnika i načelnika). Istakla je da je trenutno u toku provođenje uvodnih obuka za vijećnike čiji je cilj da pomogne novoizabranim vijećnicima da steknu polazni uvid u funkcionisanje lokalne samouprave, kako bi mogli da uspješno izvršavaju svoje uloge i odgovornosti i saraduju sa drugim odgovornim akterima. Naglasila je da je do sada obuku prošlo 22 općinska/gradska vijeća, te da je planirano da ovu vrstu obuke prođe još 10 jedinica lokalne samouprave.

Predsjedništvo Saveza je primilo k znanju ovu informaciju.

7.3. Projekat Vijeća Evrope „Akademija za lidere“

Vesna Travljanin je izvijestila da Savez općina i gradova Federacije BiH zajedno sa Savezom opština i gradova Republike Srpske, i u saradnji sa Vijećem Evrope, realizira program pod nazivom „Akademija za lidere“. Istakla je da je ovaj program namjenjen novoizabranim

načelnicima i odabranim predstavnicima u organima lokalne uprave, te da je podijeljen u tri faze od kojih je jedna već realizovana.

Predsjedništvo Saveza je primilo k znanju ovu informaciju.

7.4. Projekat „Jačanje saradnje saveza općina i gradova u BiH“ – AMCS

Selma Fišek je istakla da Projekat „Podrška savezima općina/opština i gradova (AMCS)“ predstavlja zajedničku inicijativu Saveza općina i gradova Federacije BiH, Saveza opština i gradova Republike Srpske i Misije OSCE-a u Bosni i Hercegovini. Navela je da je riječ o projektu koji je započeo u junu 2013. godine i koji ima za cilj jačanje lokalne samouprave u Bosni i Hercegovini kroz jačanje saveza u zastupanju i lobiranju interesa jedinica lokalne samouprave. Također je naglasila da je projekat fokusiran na: jačanje saradnje između Saveza općina i gradova Federacije BiH i predsjedavajućih i sekretara općinskih/gradskih vijeća, jačanje saradnje između Saveza i koordinatora za rad sa Savezom, i poboljšanje saradnje Saveza općina i gradova Federacije BiH i Parlamenta Federacije BiH.

Predsjedništvo Saveza je primilo k znanju ovu informaciju.

7.5. Projekat „Regionalni program lokalne demokratije na Zapadnom Balkanu“ (ReLOaD)

Vesna Travljanin je informisala članove Predsjedništva da se u početnoj fazi projekta „Regionalni program lokalne demokratije na Zapadnom Balkanu“ ReLOaD vršio odabir partnerskih jedinica lokalne samouprave kojima će biti pružena podrška u daljem razvoju i usavršavanju transparentnih mehanizama za raspodjelu sredstava namijenjenih za finansiranje projekata organizacija civilnog društva, čime će unaprijediti svoj rad, postati još efikasnije i efektivnije u pružanju usluga građanima te dodatno doprinijeti boljim razvojnim rezultatima. Istakla je da je do sada u ovaj projekat ušlo šest jedinica lokalne samouprave iz Federacije BiH.

Predsjedništvo Saveza je primilo k znanju ovu informaciju.

7.6. Konferencija „Dvije godine od stupanja na snagu Sporazuma o stabilizaciji i pridruživanju“

7.7. Generalna skupština NALAS-a

7.8. Sastanak Evropske komisije regiona, Radna grupa Zapadnog Balkana

Vesna Travljanin je izvijestila objedinjeno o tačkama pod 7.6., 7.7. i 7.8. navodeći da je 07.06. 2017. godine u Sarajevu održana konferencija o otvorenim pitanjima Sporazuma o stabilizaciji i pridruživanju na temu: „Dvije godine od stupanja na snagu SSP-a“, te da je delegacija Saveza prisustvovala ovoj konferenciji. Dalje je navela da je Mreža asocijacija lokalne samouprave u jugoistočnoj Evropi – NALAS, u Beču od 17. do 19. maja 2017. godine održala XII Generalnu skupštinu, istakavši da je paralelno sa ovim događajem održana i Dunavska konferencija za vode. Vesna Travljanin je naglasila da je za novog predsjednika NALAS-a izabran Mićo Mičić koji je zamjenik predsjednika Saveza opština i gradova Republike Srpske, te da bi, kada bude naredna rotacija za predsjednika NALAS-a, trebalo insistirati da to bude predstavnik jedinica lokalne samouprave iz Federacije Bosne i Hercegovine.

Vesna Travljanin je također informisala Predsjedništvo da je 31.05.2017. godine u Briselu održan sastanak Odbora za Zapadni Balkan u okviru Evropskog komiteta regija. Tema ovog sastanka je bila integracija zemalja Zapadnog Balkana i problemi na tom putu iz ugla lokalnih zajednica, dok su u fokusu sastanka posebno bile Bosna i Hercegovina i Albanija. Navela je da se, ispred Saveza opština i gradova Federacije BiH, skupu obratio Semir Efendić, načelnik Općine Novi Grad Sarajevo.

Predsjedništvo Saveza je primilo k znanju ove informacije.

7.9. Zapisnik s inicijalnog sastanka "Platforma za dijalog u sektoru vodnih usluga u BiH"

Selma Fišek je navela da je Predsjedništvo Saveza na sjednici održanoj 05.04.2017. godine u Tomislavgradu dalo saglasnost za potpisivanje Memoranduma o razumijevanju između Saveza opština i gradova Federacije BiH, Međunarodne asocijacije vodoopskrbnih kompanija (IAWD) i Svjetske banke u svrhu realizacije projekta "Platforma za prikupljanje parametara pokazatelja stanja vodovodnih preduzeća u BiH – Danubis".

Naglasila je da je 5. i 6. aprila 2017. godine u Banjaluci, uz podršku i partnerstvo Ministarstva vanjske trgovine i ekonomskih odnosa Bosne i Hercegovine, Ministarstva poljoprivrede, vodoprivrede i šumarstva Unsko-sanskog kantona, Saveza opština i gradova Federacije BiH, Saveza opština i gradova Republike Srpske, Udruženja Vodovodi Republike Srpske, Udruženja poslodavaca komunalne privrede Federacije BiH i Udruženja za oblasti voda i zaštite okoliša „Aquasan mreža u BiH“, održana regionalna konferencija pod nazivom „Održivost vodnih usluga u BiH“.

Predsjedništvo Saveza je primilo k znanju ovu informaciju.

7.10. Posjeta Visoke delegacije kongresa lokalnih i regionalnih vlasti Vijeća Evrope Bosni i Hercegovini

Vesna Travljanin je informisala Predsjedništvo o posjeti Visoke delegacije kongresa lokalnih i regionalnih vlasti Vijeća Evrope Bosni i Hercegovini koja je u Bosni i Hercegovini boravila 25. i 26. maja u okviru postizbornog dijaloga nakon lokalnih izbora održanih u oktobru prošle godine,

te implementacije mehanizama kongresa za procjenu situacije lokalne i regionalne demokratije u zemljama članicama. Istakla je da su se članovi delegacije, između ostalog, sastali sa predsjednikom Federacije Bosne i Hercegovine Marinkom Čavarom kao i sa predstavnicima Saveza općina i gradova Federacije Bosne i Hercegovine kojom prilikom su razgovarali o stanju po pitanju lokalne i regionalne demokratije u Bosni i Hercegovini.

Predsjedništvo Saveza je primilo k znanju ovu informaciju.

Hamdo Ejubović je naglasio da Predsjedništvo podržava sve aktivnosti koje se tiču unapređenja samog Saveza s tim da se Predsjedništvo Saveza informiše o tim aktivnostima.

8. Tekuća pitanja

8.1. Tužba Saveza općina i gradova Federacije BiH protiv Federacije BiH vezano za otplatu kredita prema Međunarodnom monetarnom fondu

Hamdo Ejubović je pozvao Nedima Memića da upozna Predsjedništvo sa uslovima u pogledu svog konsultantskog angažmana po pitanju sudskog spora vezanog za tužbu Saveza protiv Federacije BiH.

Nedim Memić je istakao da za svoj trenutni angažman traži iznos od 5.000,00 KM, a da mu se u slučaju dobivanja spora, što je po njegovom mišljenju izvjesno, isplati 1,25% od iznosa tužbenog zahtjeva.

Hamdo Ejubović je naveo da procentualno taj iznos izgleda puno za naše prilike.

Mustafa Resić je istakao da mi uvijek gledamo šta plaćamo, a da također trebamo gledati i šta dobijamo.

Vesna Travljanin je napomenula zbog novih članova Predsjedništva da je Nedim Memić bio prisutan na posljednje dvije sjednice Predsjedništva. Istakla je da je prethodni advokat dao otkaz punomoći, te da je Predsjedništvo ovlastilo novog advokata Danijelu Saller-Osenk da zastupa Savez u ovom postupku. Naglasila je da je Danijela Saller-Osenk angažovala Nedima Memića kao konsultanta iz oblasti finansija da pruži stručnu pomoć u ovom predmetu. Također je naglasila da je Nedim Memić ranije održao sastanak sa direktorom Saveza gdje je iznio svoje uslove, ali da ona kao direktor nije mogla bez Predsjedništva odlučiti o tome.

Predsjedništvo Saveza je zaključilo da će se o postavljenim uslovima za angažman konsultanta izjasniti na narednoj sjednici Predsjedništva.

8.2. Imenovanje zamjenika predstavnika Saveza u Savjetu za strane investitore Federacije BiH

Hamdo Ejubović je predložio Nermina Mandru za zamjenika predstavnika Saveza u Savjetu za strane investitore Federacije BiH koji bi prisustvovao sastancima Savjeta u slučaju spriječenosti predstavnika Saveza (Hamdo Ejubović).

Predsjedništvo Saveza je usvojilo prijedlog o imenovanju Nermina Mandre za zamjenika predstavnika Saveza općina i gradova Federacije BiH u Savjetu za strane investitore Federacije BiH.

Zlata Turkić je dodala da nisu uvaženi stavovi Saveza po pitanju Prijedloga zakona o fondu za zaštitu okoliša i energetske efikasnosti, te da bi Savez trebao ponovo poslati te stavove Parlamentu Federacije BiH.

Predsjedništvo Saveza je usvojilo ovaj prijedlog.

Nakon konstatacije da su sve tačke Dnevnog reda iscrpljene, Hamdo Ejubović je zatvorio Prvu sjednicu Predsjedništva Saveza u 14 sati i 30 minuta.

Zapisnik sačinila:
Selma Fišek

Predsjednik Predsjedništva Skupštine Saveza
Hamdo Ejubović, s.r.